



Rabu, 18 Desember 2024
Ogen: Perb.Rasul 9:36-39



"Mere Asa Kengasupen"



Tabita (Dorkas ertina belkih beru-beru), sekalak diberu si mehuli dengen mereken geluhna lako mperdiateken ras nampati kalak si lit i sekelewetna, alu erbahan uis ras baju man kalak musil ras diberu singgo mbalu. Gedang-gedang kegeluhenna, Tabita nampati kalak si mesera baban geluhna seh ia sakit janah mate. Kerina kalak si pernah isampatina bage pe si tading i sekelewetna erceda ate i bas kematen Tabita. Kerina kalak kebenen ras ermorah ate erkiteken kiniulin si ibahan Tabita bas geluhna. Tabita ngelakoken perbahanen si mehuli; Tabita mereken usihen si payo man kalak si tading i kuta Jope; Tabita ngelakoken/mere asa kengasupenna man kalak si lit i sekelewetna; i bas kerina si ibahan Tabita ilakokenna alu meriah ukur dengen la ngarapken balasen nandangi kai si ibahanna.

Mere asa kengasupen e me tema paksa tenengta wari enda, arah tema enda tentuna ersura-sura kal kita gelah selaku Moria pe kita ngasup mere asa kengasupen bage pe kebeluhen si lit bas kita. Umpamana: adi beluh kita erbahan pangan-pangan (bentuk kue-kue ulang tahun), jenari lit teman Morianta si kurang kengasupenna lako nukur kue ulang tahun man dirina entah man anakna; banci saja si bahan jenari si bereken, entah na pe lit bajunta entahna baju anakta si lanai siat tapi mejile denga, banci si sumbangken man kalak si perlu; beluh kita jadi benang penjarumi tupung lit persoalen, jadilah kita penengah gelah dame pusuh kalak si itengah; artina melala kal si banci si lakoken guna erbahan si mehuli bas kegeluhenta asa gegeh rikut pe ras kengasupenta.

Moria e me Tabita masa gundari enda, si mediate, kepate ras pe ersuruh ukurna lako nehken dengen ndalanken si mehuli bas tengah-tengah kegeluhenna; mere rikutken kengasupen si lit bas geluhna. Marilah si pakeken geluhta nehken si mehuli rikut singen ate Tuhan.